



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 749/4 Prot.

Tiranë, më 11.12.2023

V E N D I M

Nr. 243, datë 11.12.2023

Bazuar në nenin 32/1/a dhe nenin 33 të ligjit 10221/2010 “Për Mbrojtjen nga Diskriminimi”, të ndryshuar, pranë Komisionerit për Mbrojtjen nga Diskriminimi është paraqitur ankesa nr. 123, datë 16.06.2023¹, e J.C, i përfaqësuar nga Shoqata Rinore Sportive Studenti (SHRSS) kundër Federatës Shqiptare Taekwondo-World (FSHT), në të cilën pretendohet për diskriminim për shkak të “përkatësisë në një grup të veçantë²”.

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I:

I. Parashtrimi i fakteve sipas subjektit ankues.

Sipas shpjegimeve të dhëna në formularin e ankesës dhe me e-mail-in datë 06.07.2023, subjekti ankues, në mes të tjerash informon se: “Shoqata ka qenë vazhdimisht subjekt i diskriminimit në vendimet e marra nga Komisionet e Federatës Shqiptare Taekwondo, në të cilën shoqata është tashmë anëtare me të drejta të plota.

Organika e Federatës ka qenë kundër aderimit të trajnerit J.C dhe Shoqatës Rinore Sportive Studenti në Klubin Studenti, pasi këtë pozicion e dëshironin për një anëtar tjetër të federatës (z. Xh.H). Kjo dëshirë e tyre është tërësisht subjektive dhe ne si shoqatë kemi zbatuar rregulloren në çdo hap tonin. Dëmet e ardhura nga vendimet e Federatës Shqiptare të Taekwondo kanë qenë të shumta.

Në vitin 2021 trajneri J.C u punësua si trajner në Klubin Shumësportësh Studenti, bazuar në rregulloren e klubit në fjalë. Në datë 22.11.2021 është lidhur kontratë bashkëpunimi mes Klubit

¹ Ankesa është plotësuar nga ankuesi, me informacionin dhe dokumentacionin e dërguar me e-mail-in datë 06.07.2023.

² Si anëtar dhe trajner i Shoqatës Rinore Sportive Studenti të Klubit Studenti.

Shumësportësh Studenti dhe Shoqatës Rinore Sportive Studenti, bazuar në rregulloren e klubit. Këto kontrata mundësojnë që Shoqata Rinore Sportive të përfaqësojë Klubin Studenti në të gjitha aktivitetet sportive, ku anëtarët e shoqatës marrin pjesë. Federata përkatëse e disiplinës së Taekwondo nuk e ka përkrahur këtë bashkëpunim të ligjshëm dhe menjëherë është shprehur kundër (referuar e-mail-it datë 12.11.2021 të sekretarit të përgjithshëm të Federatës dhe deklaratës zyrtare në facebook të Federatës në datë 12.11.2021) dhe ka marrë vendime diskriminuese ndaj shoqatës dhe anëtarëve. Në Nëntor 2021 në adresën e-mail zyrtare të anëtarëve të Federatës Shqiptare Taekwondo, sekretari i federatës dërgon një e-mail ku pasqyron kërkesën e rianëtarësimit të klubit, si një kërkesë të “pa drejtë”, pasi organika e federatës nuk ishte dakord me trajnerin dhe shoqatën e aderuar tek Klubi Studenti. Sekretari shkruan në e-mail se ky pozicion ishte i dëshiruar nga një trajner tjetër, i përkrahur nga Federata Shqiptare Taekwondo dhe se nuk e përkrahnin trajnerin J.C dhe Shoqatën Rinore Sportive Studenti. Nga momenti që shoqata filloi bashkëpunimin me klubin, është sulmuar vazhdimisht nga Federata Shqiptare e Taekwondo! Duke gjykuar subjektivisht të gjithë situatën, organika e federatës ka gjykuar në dëm të shoqatës dhe anëtarëve të saj, me shkakun e vetëm se nuk ishte dakord me këtë bashkëpunim.

Së fundmi jemi informuar mbi vendimet e komisionit ekzekutiv të datës 25.05.2023. Në këtë mbledhje është marrë vendim “për 2 vjet pezullim ndaj trajnerit të shoqatës J. C, për sjellje jo etike kundrejt gjyqtarëve në aktivitete zyrtare”. Ky vendim i komisionit ekzekutiv është i pabazuar në rregullore, pasi rregullorja citon qartë kompetencat e Komisionit të Disiplinës.

Nga ana e komisionit ekzekutiv nuk janë zbatuar, neni 14, pika 1/d dhe neni 21, pika 2. Ky informacion vjen nga komisioni i disiplinës, të cilët nuk kanë asnjë njohuri për kërkesën e komisionit ekzekutiv dhe as nuk është marrë vendim i veçantë për t’ia kaluar çështjen komisionit ekzekutiv. Vlen për tu theksuar se kur kjo çështje është marrë në shqyrtim nga komisioni i disiplinës, asnjë dokumentacion nuk është dërguar tek anëtarët e komisionit të disiplinës”.

Subjekti ankues, kërkon nga Komisioneri për Mbrojtjen nga Diskriminimi, konstatimin e diskriminimit dhe heqjen e masës për pezullim 2-vjeçar për trajnerin J.C.

II. Ndjekja e procedurës për shqyrtimin e ankesës nga Komisioneri.

Komisioneri mori në shqyrtim ankesën, në referencë të kompetencës së parashikuar në nenin 32, pika 1, shkronja “a”, të ligjit nr. 10221/2010 “Për Mbrojtjen nga Diskriminimi”, të ndryshuar, që i jep të drejtën të shqyrtojë ankesat nga personat ose grupet e personave që pretendojnë se janë diskriminuar, sikurse parashikohet në këtë ligj.

Ligji nr. 10221/2010 “Për Mbrojtjen nga Diskriminimi”, i ndryshuar (LMD), garanton mbrojtje nga diskriminimi bazuar në një listë jo shteruese shkaqesh. Në nenin 1 të LMD parashikohet se: “Ky ligj rregullon zbatimin dhe respektimin e parimit të barazisë dhe mosdiskriminimit në lidhje me racën, etninë, ngjyrën, gjuhën, shtetësinë, bindjet politike, fetare ose filozofike, gjendjen ekonomike, arsimore ose shoqërore, gjininë, identitetin gjinor, orientimin seksual, karakteristikat e seksit, jetesën me HIV/AIDS, shtatzëninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore,

predispozicionet gjenetike, pamjen e jashtme, aftësinë e kufizuar, përkatësinë në një grup të veçantë, ose me çdo shkak tjetër”.

Në nenin 3/1, të LMD parashikohet se: *“‘Diskriminim’ është çdo dallim, përjashtim, kufizim ose preferencë, bazuar në cilindo shkak të përmendur në nenin 1 të këtij ligji, që ka si qëllim ose pasojë pengesën ose bërjen të pamundur të ushtrimit në të njëjtën mënyrë me të tjerët, të të drejtave e lirive themelore të njohura me Kushtetutën e Republikës së Shqipërisë, aktet ndërkombëtare të ratifikuara nga Republika e Shqipërisë, si dhe nga ligjet në fuqi”.*

Bazuar në nenin 7, pika 1, të Ligjit 10221/2010 *“Për Mbrojtjen nga Diskriminimi”*, të ndryshuar, mbrojtja nga diskriminimi garantohet ndaj çdo veprimi ose mosveprimi të autoriteteve publike ose personave fizikë a juridikë, që marrin pjesë në jetën dhe sektorët publikë ose privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash.

Pas analizimit paraprak të ankesës, u konstatua se nga pikëpamja formale, ajo i plotësonte kërkesat e parashikuara nga neni 33/3 të ligjit 10221/2010 *“Për Mbrojtjen nga Diskriminimi”*, të ndryshuar. Në këto kushte Komisioneri, filloi procedurat përkatëse për shqyrtimin e saj.

- Me shkresën nr. 749/1, datë 13.07.2023, Komisioneri për Mbrojtjen nga Diskriminimi, ka njoftuar dhe kërkuar informacion nga Federata Shqiptare e Taekwondo, për ankesën e bërë nga J.C dhe kërkoi dokumentacionin si më poshtë:
 - Informacion dhe kopje të dokumentacionit mbi statusin e Shoqatës Rinore Sportive Studenti, si anëtare e Federatës Shqiptare të Taekwondo.
 - Fakte dhe prova lidhur me veprimet e ankuesit që kanë sjellë si pasojë marrjen e vendimit për pezullimin 2-vjeçar të tij. Të depozitohen në cilësi prove pranë KMD-së të gjitha aktet mbi të cilat është mbështetur vendimmarrja e Federatës Shqiptare të Taekwondo;
 - Informacion mbi procedurat paraprake që ka ndjekur FSHT, duke i garantuar ankuesit të drejtën për t’u dëgjuar dhe për të paraqitur observacionet e tij, para marrjes së vendimit të sipërcituar;
 - Informacion nëse ankuesi e ka kundërshtuar administrativisht vendimin për pezullimin e tij, pranë FSHT-së;
 - Informacion mbi të gjitha masat disiplinore të dhëna ndaj trajnerëve, duke cilësuar dhe emrin e shoqatës, përgjatë viteve 2021-2023;
 - Kopje të Statutit, Kodit të Etikës dhe Rregullores së Brendshme të FSHT-së.

Me shkresën nr. 202, datë 26.07.2023, Federata Shqiptare e Taekwondo World, në mes të tjerash informoi Komisionerin se: *“Lidhur me kontratën mes Shoqatës Rinore Sportive Studenti dhe Klubit Studenti, ne si Federatë nuk kemi pretendime. Vërejtja që i është dhënë ankuesit, ka të bëjë me faktin se Shoqata Rinore Sportive Studenti është regjistruar në kompeticionet kombëtare dhe ndërkombëtare si Klubi Studenti, kur sipas Statutit të Federatës në nenin 4, Anëtarësia dhe sipas Rregullores së Brendshme, Kreu III, neni 17 dhe Kreu V, në këto kompeticione marrin pjesë*

Shoqatat anëtare të Federatës tonë. Ndërsa Klubi Studenti nuk është anëtar i Federatës tonë. Fakti se midis Shoqatës dhe Klubit ka një marrëveshje, ajo duhet të zbatohet vetëm përse shkruhet aty midis dy palëve, por jo të veprohet në kundërshtim me Statutin e Federatës ku Shoqata Rinore Sportive Studenti është anëtare.

Në lidhje me Vendimin e Komisionit të datës 25.05.2023, është bërë vetëm propozimi që Shoqata Rinore Sportive Studenti të kaloj në statusin provizor, por akoma nuk është marrë një vendim nga Federata Shqiptare e Taekwondo në lidhje me këtë propozim. Ky propozim do të shqyrtohet në Asamblenë e Përgjithshme të radhës, e cila akoma nuk është vendosur se kur do mblidhet.

Në lidhje me trajnerin J.C s'kemi patur dhe as nuk kemi problem me zgjedhjet e tij.

Në lidhje me pretendimet për trajnerin J.C, çdo vendim u është komunikuar palëve me e-mail dhe çdo informacion dhe përgjigje është dhënë në e-mail-in ku na kanë shkruar.

Gjithashtu vëmë re se në shkresat tuaja, kërkoen edhe dokumente të cilat nuk janë pjesë e pretendimeve për të cilat kërkon shpjegime, kërkesa të cilat nuk i kuptojmë pse janë bërë.

Ankuesi për çdo pakënaqësi, duhej ti ishte drejtuar fillimisht Federatës, organeve të saj përgjegjëse për çdo sektor dhe pastaj Gjykatës, duke patur parasysh ligjin për OJF-të mbi bazën e të cilit Shoqatat marrin statusin juridik si edhe veprojnë e operojnë juridikisht dhe financiarisht”.

- Mbështetur në nenin 33/8, të ligjit 10221/2010 “Për Mbrojtjen nga Diskriminimi”, të ndryshuar, për shqyrtimin e mëtejshëm të ankesës, Komisioneri me shkresën nr. 749/2, datë 11.10.2023 njoftoi, palët për zhvillimin e seancës dëgjimore me datë 26.10.2023, për të parashtruar dhe argumentuar në mënyrë të drejtpërdrejtë pretendimet e palëve në proces, si dhe kërkoi kopje të dokumentacionit si më poshtë:
 - Fakte dhe prova lidhur me veprimet e ankuesit që kanë sjellë si pasojë marrjen e vendimit për pezullimin 2-vjeçar të tij. Të depozitohen në cilësi prove pranë KMD-së të gjitha aktet mbi të cilat është mbështetur vendimmarrja e Federatës Shqiptare të Taekwondo;
 - Informacion mbi procedurat paraprake që ka ndjekur FSHT, duke i garantuar ankuesit të drejtën për t’u dëgjuar dhe për të paraqitur observacionet e tij, para marrjes së vendimit të sipërcituar;
 - Informacion nëse ankuesi e ka kundërshtuar administrativisht vendimin për pezullimin e tij, pranë FSHT-së;
 - Informacion mbi të gjitha masat disiplinore të dhëna ndaj trajnerëve, duke cilësuar dhe emrin e shoqatës, përgjatë viteve 2021-2023.

Seanca dëgjimore u zhvillua me datë 26.10.2023, me praninë e përfaqësueses me Prokurë të Posaçme³ dhe Autorizimin e administruar në dosje, të Shoqatës Rinore Sportive Studenti: I. K, dhe në mungesë të përfaqësuesve të Federatës Shqiptare të Taekwondo.

³ Prokurë e Posaçme me nr. repertori 934, nr. koleksioni 258, datë 05.07.2023, lëshuar nga Noterja A. M.

Përfaqësuesit e palës ankuese, gjatë seancës parashtruan të njëjtat fakte e rrethana që kishin paraqitur edhe në formularin e ankesës dhe në vijimësi gjatë komunikimeve me e-mail me KMD-në.

- Në vijim të seancës dëgjimore, Shoqata Rinore Sportive Studenti, nëpërmjet e-mail-it të datës 01.12.2023, ka falenderuar Komisionerin për procedurën e zhvilluar për shqyrtimin e ankesës së saj dhe ka kërkuar të tërhiqet nga ankesa e regjistruar me nr. 123, datë 16.06.2023, pranë Zyrës së KMD-së, pasi Shoqata po e ndjek këtë çështje në Gjykatë.

Në nenin 32, pika 3, të ligjit 10221/2010 *“Për Mbrojtjen nga Diskriminimi”*, të ndryshuar përcaktohet: *“3. Për shqyrtimin e ankesave që i drejtohen, Komisioneri zbaton normat e parashikuara në Kodin e Procedurave Administrative, me përjashtim të procedurave që parashikohen nga ky ligj”*.

Në nenin 90/3 të ligjit nr. 44/2015 *“Kodi i Procedurave Administrative i Republikës së Shqipërisë”*, të ndryshuar, parashikohet se: *“Procedura administrative, e nisur me kërkesë apo kryesisht, deklarohet e përfunduar pa një vendim përfundimtar për çështjen, në rastet e parashikuara në nenet 93-96 të këtij Kodi. Deklarata e përfundimit të procedurës administrative, pa një vendim përfundimtar për çështjen, përbën akt administrativ”*.

Në nenin 94⁴/1 të ligjit nr. 44/2015 *“Kodi i Procedurave Administrative i Republikës së Shqipërisë”*, të ndryshuar, parashikohet se: *“Si rregull, në procedurën administrative të nisur me kërkesë, organi publik deklaron përfundimin e saj pa një vendim përfundimtar për çështjen, nëse pala që ka paraqitur kërkesën e tërheq atë”*.

Procedura administrative konkrete pranë Komisionerit, është iniciuar mbi bazën e ankesës së paraqitur nga subjekti ankues, J.C, përfaqësuar nga Shoqata Rinore Sportive Studenti, e cila, me anë të kërkesës të përcjellë nëpërmjet e-mail-it datë 01.12.2023, është tërhequr nga ankesa pranë KMD-së.

Bazuar në dispozitat e mësipërme ligjore, si dhe kërkesën për tërheqje nga ankesa e paraqitur nga subjekti ankues në datën 01.12.2023, Komisioneri vlerëson se, procedura për shqyrtimin e ankesës nr. 123, datë 16.06.2023, të paraqitur nga J.C, përfaqësuar tek Komisioneri nga Shoqata Rinore Sportive Studenti (SHRSS) kundër Federatës Shqiptare Taekwondo-World (FSHT), nuk mund të vazhdojë, por duhet të deklarohet e përfunduar pa një vendim përfundimtar, për shkak se subjekti ankues është tërhequr nga ankesa dhe nuk identifikohet ndonjë interes publik që do të legjitimonte vazhdimin e procedurës, nga ana e këtij organi publik.

PËR KËTO ARSYE :

⁴ *“Tërheqja e ankesës”*.

Mbështetur në nenin 90/3 dhe 94/1 të ligjit nr. 44/2015 “Kodi i Procedurave Administrative i Republikës së Shqipërisë”, nenin 32, pika 1, shkronja “a” dhe nenin 33, pika 1, të ligjit 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi,

V E N D O S I:

1. Të deklarojë të përfunduar procedurën administrative për shqyrtimin e ankesës nr. 123, datë 16.06.2023, të J.C, i përfaqësuar nga Shoqata Rinore Sportive Studenti, kundër Federatës Shqiptare Taekwondo-World (FSHT), për shkak se subjekti ankues është tërhequr nga ankesa pranë KMD-së.
2. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijani.

KOMISIONERI

Robert GAJDA